

LEVÍTICO

Diosan israel unikama
'uchakë anun tërëan
nëtë ñuikë bana

16 ¹Usa 'ain ka Nukën 'Ibu Moisésbë banakëxa, Aarónën bëchikë rabé axa anuax Nukën 'Ibubë banati 'akë, kataitsi 'ukëmëu upíira kakë a 'uramaira obiani kuanibia ñukë 'ain. ²Usa 'ain ka Nukën 'Ibun Moisés kakëxa: —Min xukén Aarón kamina ësokín kati 'ain, bëtsi nëtëan uisaxi anu 'ëx 'ikë upíira kakë chupa bëpankë a kaxú atsíaxma 'inun kanan kamina, bunántisa okín 'akë anun mapukë a 'urama oxuma 'anun kati 'ain, anu kuaníbi ka bamati 'ikën; 'ëx kana aín mapúti 'ikë anu kuin mëu mërati 'ain. ³Aarónën ka upíira kakë anua 'ëbë banati anu atsínkin achúshi vaca bëna aín 'ucha kupí buánan achúshi carnero 'ë rabikín 'aímai këñutanun xaroti buánti 'ikën. ⁴Usai anu kuankín ka aín tari upíira, sacerdotekaman pañukë chupa lino 'akë, 'anan ka a 'ukëmëu pañukë lino 'akë a 'imainun, anun tsitëkërëkítí 'akë anun tsitëkërëkíanan aín mañuti akë aribi mañuax kuanti 'ikën. Ax ka chupa kata upíira a 'ikën, usa 'ain ka akama pañunux pain upiti nashiti 'ikën.

⁵Usai 'itankëxun ka Israel unikama 'axúnti rabé chibu

bitankëxun Aarónën atun 'ucha kupí 'axuanan ka achúshi carnero 'aímai këñutanun 'ë xaroxunti 'ikën. ⁶'Atankëxun ka vaca bëna bëkë a aín 'uchakë kupí xarokësa 'inun 'anan ka 'ën aín 'uchakëkama mëníonan aín aínsi 'ibukaman 'uchakë kupínribi 'ati 'ikën. ⁷Usakín 'atankëxun ka cabra rabé aribi, 'ë 'axunkín anun 'ëbë mëranani atsínti xubusa okín 'akë aín xëkuë ëman 'urama anuxun 'ati 'ikën; ⁸'atankëxun ka ñuratsu amo rabébi kuënëoxun uimiu kara pakëtía isnuxun anun cabra rabé a tanti 'ikën: Uinu 'ikë ax kara 'ënan 'iti 'ikën 'imainun kara uinu 'ikë ax Azazelnan ikë isnuxun tanti 'ikën. ⁹Usakín ñuratsukun tankëxa amioi kuënëokë pakëkë ax ka 'ënan 'iti 'ikën, a ka Aarónën kamabi Israel unikaman 'ucha kupí xaroti 'ikën; ¹⁰aínbi ka ñuratsu ainan 'itanun 'akë ax amiki pakëkë ax ka Azazelnan 'iti 'ikën. A ka rëkëma asábi anun aín kata itsi upíira anu atsínkiantí aín xëkuë a 'urama anu bëkë 'iti 'ikën, anu bëkë 'ain ka atun 'uchakama mëníokin anu 'aruia ka anu uni 'ikëma me anua Azazel kakë ñunshín 'atíma 'ikë anu atun 'uchakama buani kuantanun xuti 'ikën.

¹¹Aarónën ka vaca bakë a rëtan-këxun 'uchakama kupí xaroti 'ikën, usakín 'aia kana aín 'ucha

tërëanan aín aintsi 'uchakama-ri-ribi tërëxunti 'ain. ¹²'Atankëxun ka tasunsa okin 'akë anu 'arukin aín tsi ënxaira a kata itsi upíira anuax Nukën 'Ibubë banati anua biti 'ikën, bianan ka aín chimapu sanuira rënkë a məkën rabé okin bixun mësukukin 'arubiankin anua kata itsi upíira 'ikë anun bëpankë chupa 'ukëmëu anu uanti 'ikën; ¹³usakin 'axun ka kata itsi upíira kakë chupa këxtú a rapasu 'ikë tsísa anu 'ën istisabi okin uanxun ro sanuira a nanti 'ikën, usakin anu nankëx aín kuinan tēxëkirukin bunántisa kurin ratakakakin 'akë a mapukë 'ain ka. Aarón ñutima 'ikën.

¹⁴Usakin 'atankëxun ka vaca bakë imi chukúmashi, aín məkën mëpukankixun anun bunántisa okin 'akë aín mapúti ánskati 'ikën, 'anan ka aín 'ipítu 'ikëishi ñuina imi anun ánskati 'ikën. 'Atankëxun ka mapai achúshi 'imainun rabé okin ñuina imin aín mapúti aín rëbumi 'ikë aribi ánskati 'ikën, ¹⁵usakin 'atankëx anuax chikí-tankëxun ka chibu aribi Israel unibunën 'ucha kupí rëti 'ikën, rëkin aín imi 'itsamashi xampami bitankëxun ka kata itsi upíira a 'ukëmëu 'ikë chupan bëpankë a kaxú uantakëxun; anun bunántisa okin kurin ratakakakin 'akë aín mapúti kaxú 'anan aín rëbu vaca bëna imin 'akësaribi okin anun ánskati 'ikën. ¹⁶Usakin 'akëxun ka kata itsi upíira a mëníokín anua ñu upíshi 'ati 'ikëbi 'aíma 'atima ñu 'ai 'uchakin Israel unikaman

'akëma 'imainun ñunshinakëkin ñu 'ai 'uchakë akama mëníoti 'ikën. Usaribi okin ka anuax 'ëbë banati xubusa okin 'akë atu nëbëtsi 'ikë ñu 'atima 'akëbëtan atun 'uchakaman 'atimokë 'ikëbi aribi mëníoti 'ikën. ¹⁷Usakin 'anun 'ën kakëxun 'aia Aarón kata itsi upíira a 'ukëmëu 'imainun ka ax pain sënëntamainun uíxbi xubusa okin 'akë anu kuantima 'ikën. Usakin 'akin ain 'ucha 'imainun aín xanu aín bakë bëchikë kamanan 'imainun kamabi Israel unikaman 'ucha mëníotankëx, ¹⁸chikíkiyani kuanxun ka anuxun ñuina 'ë xaroxunti aribi mëníoti 'ikën. Vaca bëna aín imi 'imainun chibu imi a chukúmashi bitankëxun, ka anun i vaca manchansa okin 'akë aribi 'anan anuxun ñuina xaroti 'akë aribi buinarakin anun shiti 'ikën, ¹⁹'anan ka məkën rëbun imi bikë ami pukatankëxun anun mapai 'imainun rabé okin anuxun ñuina xaroti a ánskati 'ikën. Usakin 'akin ka 'atima ñuishi 'akian Israel unikaman tsáimikë a upí 'itánun mëníoti 'ikën.

²⁰Usakin anuax 'ëbë banati xubusa okin 'akë a mëua 'ikë upí kakë akëñun anuxun ñuina xaroti akama pain mëníokin sënëontankëxuan Aarónën, chibu rëkëma a bitánun kakëxun bitsínkin, ²¹bëkëbëtan ka ñuinanën maxkánu aín məkën rabé nankin, kamabi Israel unikaman bana kuakinma ñu 'atima 'akë 'imainun atun 'uchakama ami chikínati 'ikën. Usakin

'akëx ka chibun maxkánu a 'ucha-kama bërúti 'ikën, usakin 'axun ka achúshi uni anu uni 'ikëma menu buanxun ëntanun kati 'ikën.

²²Kakëxun uanxuan ënkëx anu uni 'ikëma menuax kuani nètékiankin ka chibu an Israel unikaman ñu 'atima 'akë anu uni 'ikëmaira me ruá panákë anuira buánti 'ikën.

²³Usakin 'atankëx xubusa okin chupa 'akë anu atsínuxun ka Aarónën kata itsi upíira kakë anu atsínuxuan pañukë lino 'akë aín chupa a pëtankëxun anubi nanti 'ikën. ²⁴Usakin 'atankëx ka xubusa okin 'akë anua 'ikë 'umpax anunbi nashianan aín chupa itsi pañutankëx anuax chikixun aín ñuina a pain aín 'ucha kupí 'atankëxun Israel unikamanan aribi 'axúnti 'ikën, usakin 'akëbë ka ain 'uchakama tërëanan Israel unikaman 'ucharibi tërënxunkë 'iti 'ikën. ²⁵Imainun ka atun 'ucha kupí xarokë ñuina aín xëni aribi anuxun ñuina xaroti 'akë anuxunbi xaroti 'ikën; ²⁶usokin 'amainun ka uin kara anu uni 'ikëma me anua Azazel 'ikë anu chibu ëbëtsinkë uni axribi aín chupa chukanan upiti nashitankëx anua 'ikankë anu atsínti 'ikën.

²⁷Usakin 'atankëxun ka vaca bakë 'imainun chibu atun 'ucha kupí xaronan, aín imi kata itsi upíira kakë anu atun 'ucha tërënxunun buánkë a, ka bibiankin buánxun anua 'ikankë a urinxun aín ñukama aín xaká aín puku 'imainun aín nami tukapakë a kamabi xaroti 'ikën. ²⁸Xarotankëx

ka uni an ñuina nami xarokë ax 'umpaxan nashianan aín chupa chukatankëx, anua 'ikankë anu kuantëkënti 'ikën.

²⁹Ënëx ka achúshi bana ax kikë-sabi oi mitsux 'iti bana 'iti 'ikën: mapai achúshi 'imainun rabé 'uxë 'irukë anúan mapai rabé sënénkë nètë anun kamina mitsux ñu pima samáti 'ain, 'imainun kamina mitsun ñu mëtikamaribi a nètën 'atima 'ain, usakin mitsun 'akë-bëtan ka axa mitsubë tsókë bëtsi menu 'ikë unikaman usaribi okin 'ati 'ikë, ³⁰usakin 'akëbëtan a nètënbi mitsun 'uchakama 'ën tërënxunkëbë ka a ñukama mëníokin tërënxukë 'aish atux upí 'iti 'ikën. ³¹Ax ka a ënima xëníbua 'aínbi ax kikësabi oi 'iti bana a 'ikën: ax ka achúshi nètë upíira mitsunan anun ñu pima tanti samáti nètë 'iti 'ikën.

³²Usa 'ain ka sacerdotenën bëchikë aín papan 'akësaribi okin kaísun anëké an ishi, usakin 'ati bana kikësabi okinshi atun 'ati-makëkama tërënxunun 'ati 'ikën; 'anuxun ka aín chupa lino 'akë sacerdotekaman pañukë a pañuti 'ikën. ³³Usai mëníokatankëxun ka kata itsi upíira upí kakë a mëníonan xubusa okin chupa 'akë aribi 'anan anuxun ñuina xarokë aribi mëníoti 'ikën, 'usakin 'akë-bëtan kana sacerdotenën 'atima-këkama 'anan kamabi unix 'ati-makëkama tërënti 'ain.

³⁴Ënëx ka uínsaranbi ënimami ax kikësabi oi mitsux 'iti achúshi bana 'iti 'ikën: usa 'ain ka achúshi

achúshi baritia 'irukëbëtan a sinánkin ëné bana kikësabiokin Israel unikaman aín 'ucha tërënun 'ati 'ikën.

Usakin anua Nukën 'Ibun Moisés kásabiokin ka usakin 'akëxa.

**Diosan a tanti bana
kikësoi 'ianan 'uchaima
'inun ka bana**

19 ¹Usa 'ain ka Nukën 'Ibun Moisés amiribishi katëkëankëxa: ²Kamabi Israel unikama kamina ësokin kati 'ain: mitsux kamina upí 'iti 'ain, 'ëx kana mitsun Dios 'aish uisa 'uchañumabi 'ain, usa 'ain kamina mitsúxribi upí 'inuxun uisa 'uchabi 'atima 'ain.

³Mitsun kamina min papa bana kuanan min titan banaribi kuati 'ain.

'Imainun kamina anun ñu mëetima nëtë 'ikëbë anun tantiti 'ain. 'Ëx kana mitsun Dios 'ain.

⁴Usa 'ain kamina a rabinuxun bëtsi ñu uniotima 'ain, 'imainun kamina dios isa kixun a rabinuxun manë charoxun uniotima 'ain. 'Ëx kana mitsun Dios 'ain.

⁵Uínsaran kaina mitsun a ñukama 'ë 'axunkin ñuina anun mëníonanti 'akin xaroin, anun kamina 'ëx kuëéntisabi okin 'anan unikama kuëéntisabi okin 'akánti 'ain. ⁶Ñuina 'ë xaroxunti rëxun kamina a nëtëbni piti 'ain, 'anan ka tëxëia noonkë aribi pëkarakëbëtan piti 'ain, 'aínbi ka tëxëtëkënkë a pëkaratëkënkë anun xarokë 'iti 'ikën. ⁷Uin kara

'ë 'axunkin xarokë ñuina nami a rabé 'imainun achúshi nëtë 'inúkë 'aínbi pia, ax ka upíokin iskëma 'iti 'ikën, usa 'ikë ka Diosanribi kuëntima 'ikën; ⁸uin kara a nami pia ax ka an usokin 'ai 'uchakë kupí tëmëratí 'ikën, usa 'ikë kamina mitsux anu 'ikë anua a chikínti 'ain, an Nukën 'Ibu 'axunkë ñu upíira 'ikëbi usakin 'akë 'ikë.

⁹Anúan mitsun ñu 'apákë bití nëtë 'ikëbëtan bikin kamina, kamaira këñukin bitima 'ain, 'imainun kamina baritëkënkín bikinmi tëxëokë a bitima 'ain.

¹⁰Aínbi kamina anu uvas 'apákë naë anua aín bimi bikin kamaira bitima 'ain, 'imainun kamina menu pakëkë abi baritëkënbiankin bikinma ënti aín; a kamina uni ñuñumakama 'imainun bëtsi menu 'ikë mibë tsókë unikaman binun ënti 'ain. 'Ëx kana mikaman 'Ibu Dios 'ain.

¹¹Bëtsi unin ñu kamina mëka-makantima 'ain. 'Ianan kamina këmëi bananan bëtsi unikamabë paránantima 'ain.

¹²Unin aséribi ka kixun sinánun kamina ñu 'anuxma 'ën anë ñui banatima 'ain, usai banakin kamina 'ëmi uni bananun 'imitima 'ain, usai banakin kamina 'ën anë 'atima oti 'ain, 'ëx kana min 'Ibu 'ain.

¹³Mi rapasu 'ikë uni kamina 'atima okin mëëxun 'ain ñu bikuantima 'ain.

'Ianan kamina an mi ñu mëëxunkë uni pëkarakëbëtan

kupíoxun kakinma a nētēnbi kupíoti 'ain.

¹⁴Imainun kamina pabē unika-mami 'atimati banai ami kwaitima 'ain.

'Ianan kamina anúan uni bēnxuñu niti aín bainu ami tuaxkia pakētisa okin ñu nantima 'ain. Usakin 'akinma kamina 'ēn bana kikēsabiokin 'akánti 'ain. 'Ēx kana min 'Ibu 'ain.

¹⁵Unin mix 'apu aín bētsi unibētan bana mēñíoxun kakēxun kamina kana 'aima kakinma an ñu 'akē ēanan, an ñu 'akēma a tēmēratanun 'atima otima 'ain, uisa ñu kara 'axa kixun pain istankēxun kamina a rabēbi tēmēramiti 'ain.

¹⁶Manan bēkin kin kamina abēmi 'ikē unikama ñuitima 'ain.

Min 'unánkē unían bētsi uni 'ai kuankēbē kamina abē kuantima 'ain. 'Ēx kana min 'Ibu 'ain.

¹⁷Mix abē 'ikē unimi 'atimakin sinani kamina ami nishtima 'ain.

Min 'unánkē unían 'atima ñu 'aisatania 'unánkin kamina 'axunma 'anun kati 'ain. Usakin ñu 'aia iskinbi min 'unánkē uni kakēma 'aish kamina abēbi 'uchakē 'iti 'ain.

¹⁸Axa mimi nishkē uni nuibatima ami nishanan kamina axa mibē nuibanankē unikamaishi nuibatima 'ain. Min 'unánkē uni kamina mixmi bērúankakēsari-ri okin bēruánti 'ain. 'Ēx kana mitsun 'Ibu 'ain.

¹⁹A tanti bana 'ēn mi kakē ēnēx kikēsabiokin kamina 'ati 'ain.

Mitsun 'arakakē vacamia ñuina itsin bēchinun kamina 'amitima 'ain.

Min naēnu ñu 'apákin kamina mēskukin ñu bērukama 'apátima 'ain.

'Anan kamina bētsi bētsi ñumanēn mēskukin 'akē chupa pañutima 'ain.

²⁰Uix kara an ñu 'axunkē xanu bētsi unin binuxun kakē 'aínbi abē 'iaxa, an ka a xanuxa marukēma 'ianan axia 'inun ēnkēmapain 'ikēbi, usakin akē kupín an binuxun kakē uni a kupíoti 'ikēn; 'aínbi ka uni 'imainun xanux uisabi okinma ēnkē 'iti 'ikēn. ²¹Usakin 'akē 'ixun ka unin achúshi carnero anuxun 'ē rabiti xubusa okin 'akē aín xēkuē anu buánti 'ikēn. ²²Buánxun 'inánkēxun ka sacerdotekaman carnero xarokin aín 'ucha tērenxunun ñukáxunkēxun kana, 'ēn unin 'uchakē 'ēn tērenti 'ain.

²³Uínsaran kaina anumi tsóti me anu atsini kuani anuxun ñu 'apátankēxun, kamina koia aín pēñan tēaima 'ianan, aín bimiribi rabē 'imainun achúshi baritia sēnénmikin pitima 'ain. ²⁴Anun rabē 'imainun rabē baritia sēnénkēbētan mitsun ñu 'apákē kamabi aín bimi bitankēxun achúshi fiesta 'akin 'ē nanxunti 'ain, ²⁵'imainun kamina mapai achúshi bari 'ikēbētan bixun mitsun ñu 'apákē aín bimi piti 'ain. Usokin 'akēbē ka mitsun ñu 'apákē aín bimi 'aisamaira 'inun bimiti 'ikēn. 'Ēx kana mitsun 'Ibu Dios a 'ain.

²⁶'Imainun kamina uisa ñuina namibi aín imi këñun pitima 'ain.

'Ianan kamina uisa ñu kara 'iti 'ikë ki ax sinani kiti a unántima 'ain, 'imainun kamina uisa ñu kara 'inuxun 'aia kixun sinani kitima 'ain.

²⁷Mitsun bu buinarakin tēanan kamina min kuēēni rēbu rēmēniokin tēakantima 'ain.

²⁸'Imainun kamina uni ñukë 'ain, anun rabanan mitsun nami tēatima 'ain. Usai 'ima 'ianan kamina uisa ñubi tankin mitsun naminu kuēñotima 'ain. 'Ĕx kana mitsun 'Ibu 'ain.

²⁹Mitsun 'ini bēchikë kamina bētsi bētsi unibë 'ikë xanukama 'ikēsai 'inun 'imitima 'ain. Usai 'inun ěnkēxun 'aisama ñu 'ai axbi 'atima orakanan, ka mitsun ěmanu 'ikë unikamaribi an 'atima 'imiti 'ikën.

³⁰'Anun 'ě rabiti nētë 'ikëbë kamina anun tantiti 'ain. 'Imainun kamina anuxun 'ě rabiti xubusa okin 'akë anuxunribi uisa 'atima ñubi 'atima 'ain. 'Ĕx kana mitsun 'Ibu a 'ain.

³¹Uni an ñunshinan 'amikēxun ñu 'akë 'imainun an ñu tankë uni kamanu kamina kuankantima 'ain. Usai abë banakin kamina mitsunbi 'aisama ñu 'ati 'ain. 'Ĕx kana mitsun 'Ibu Dios a 'ain.

³²Uni apankama mi rapasu ukëbë kamina ax kuaintamainun niruti 'ain. Usai 'i kamina 'ěx kikēsabi oi 'iti 'ain. 'Ĕx kana mitsun 'Ibu a 'ain.

³³Bētsi menu 'ikë unikama axa mitsubë tsókë akama kamina

ubiotima 'ain. ³⁴Mitsúxmi nuiba-nankēsaribi okin kamina aturibi nuibati 'ain, atux ka mitsusaribi 'ikën. Mitsux pain kamina atux 'ikēsaribiti Egipto menu 'ikë uni 'aímabi tsóakën. 'Ĕx kana mitsun Dios a 'ain.

³⁵Mitsun ñu tupunkin kamina 'ain chaxké 'imainun 'ain naxba anuira tupúnxumabi bētsi parántima 'ain, 'imainun kamina aín 'iě anuira sēnēn tupúnxumabi bētsi uni parántima 'ain. ³⁶Mitsun anun ñu tupúnti anun tupunkin kamina anu sēnēn tupuntia 'akë anubia aín xumúx 'itánun tupúnti 'ain. 'Ĕx kana mitsun Dios an Egipto menua mitsu chikían a 'ain.

³⁷Usa 'ain kamina a tanti bana 'ěx kikë usakinbi 'ati 'ain; a bana kamina tanti 'ain. 'Ĕx kana min 'Ibu a 'ain.

Anun a rabiti nētë 'ikëbētan rabiti ñui Dios kia bana

(Nm 28.16-25)

23 ¹Usa 'ain ka Nukën 'Ibun achúshi nētë 'ikëbētan Moisés kakēxa: ²Ĕsakin kamina Israel unikama kati 'ain: Ĕnē nētë-kamax ka anun Nukën 'Ibu rabi timéti nētë 'iti 'ikën, a kamina mitsun upí nētë kakin anēti 'ain. ³Mapai achúshi 'imainun achúshi nētë anun kamina mitsun ñu mēēti 'ati 'ain, 'aínbi kamina a 'iónxa pékarakë anun uisa ñu mēētibi 'atima 'ain; ax ka anun ñu mēētima upí nētë 'iti 'ikën. Anun kamina uinu karamina tsotin anuxunbi timéxun min 'Ibu rabikanti 'ain.

⁴A nētēkamax ka anunmi timéxun min 'Ibu ané rabikanti nētē 'ikēn, usa 'ain kamina a nētē 'ikēbē upí 'inun timékanti 'ain.

⁵Uxē isítabakē anúan mapai rabé 'itankēx rabé 'imainun rabé nētē ñantabukē anun kamina Pascua nētē inúkin 'ë rabinux timékanti 'ain.

⁶A nētē 'iónxa mapai rabé 'imainun mapai achúshi nētē 'ikē anun kamina anun chamiti ñu kēñuma akē pán pikin fiesta min 'Ibu Diosmi sinánkin 'ati 'ain. 'Akin kamina mapai achúshi 'imainun rabé nētē inumikin anun chamiti ñukēñunma 'akē pán piti 'ain. ⁷A nētē 'irutabakē axa upíra nētē 'ain kamina anun timékanti 'ain. A nētēkamaman kamina uisa ñu mēētibi 'ai tēkantima 'ain. ⁸Ianan kamina mapai achúshi 'imainun rabé nētē 'imikin anun timéxun pán pianan anun upiti timéxun min 'Ibu rabikin ñuina xaroti 'ain. A nētēn kamina uisa ñu mēētibi 'akantima 'ain.

**Anun ñu 'apákē tuatabakē
bikin usakin fiesta 'ati
ñuikin Diosan ka bana**

(Nm 28.26-31)

⁹Nukēn 'Ibun ka Moisés amiribishi katēkēankēxa:

¹⁰Israel unikama kamina ësokín kati 'ain: Uínsaran kaina 'ën mitsu 'inánuxun ka me anu bëbai kuani, anun kamina mitsun 'apákē trigo ax pain tuatabakē a nëakin bixun kamina sacerdote unikama 'inánti 'ain. ¹¹Anun tantiti nētē 'iónxa

pēkarakēbētan ka sacerdote unikaman trigo bimi upírabu 'ë 'inaishiti bikē a bëxunkēx ka asábi 'iti 'ikēn. ¹²'Imainun ka a nētēan trigo bimi nëakē bēkē a nētēnbi, mitsun 'arakakē ñuinanēn tuá achúshi baritiañu uisaibi 'ikēma aribi 'ë xaroxunti bëti 'ikēn. ¹³Bëanan ka rabé 'imainun rabé okin tupunkē kēñun aín chukú-mashi trigo putuakē aín upí xēnin chabóxun mamuakē aribi bëti 'ikēn, ax ka ñuina nanxuinshiti xarokē sanuira ro a xēkē usaribi 'iti 'ikē. 'Imainun ka achúshi litro uvas baka bikē 'ë nanxuinshiti bikē aribi ami anpēnkati nanti 'ikēn. ¹⁴Usakin anun 'ë nanxunti nētē 'itamainun kamina mitsun pán kēñun trigo tutushokē akēñun aín paxabi nankē anua bixun pitima 'ain. Ënē banax ka uínsaranbi ënkinmami ax kikēsabiokin 'ati 'ikēn, usa 'ikē ka aín papan tan 'ikē aín bakē bëchikē kamanribi uinu 'ikē menu kara tsotia anuxunbi ënē bana tankin 'ati 'ikēn.

¹⁵A nētēn mitsun trigo bimi nëakē aín upírabu 'ë nanxunti buánkē, a nētē pēkarakē ax ka anun tantiti nētē 'iti 'ikēn, anuxun kamina mapai achúshi 'imainun rabé semana sēnénmikin tupúnti 'ain. ¹⁶'Imainun ka mapai achúshi 'imainun rabé nētē anun tantiti nētē 'iónxa pēkarakē anun cincuenta nētē sēnénkē 'iti 'ikēn. Usa 'ain kamina a nētē sēnénkē anun, 'ë nanxunti bērí bitēkēnkē trigo anu nanti 'akē

anu 'è naxunti 'ain, ¹⁷'imainun kamina mitsun trigo putuakè aín upí anun chamiti ñukèñun 'akè pán rabé aribi buánti 'ain, ax ka rabé 'imainun rabé kilosa harina achúshi achúshi 'akè 'iti 'ikèn, ax ka a painmi mitsun 'apákè trigo aín bimi 'è 'inánti bikè a 'iti 'ikèn.

¹⁸A pánkama kèñunbi kamina mapai achúshi 'imainun rabé carnero aín upíira uisaibi 'ikèma achúshi baritiañu, 'imainun achúshi vaca bëna kèñun rabé carnero, akamabi timètankèxun 'è 'axunkin xaroxunkè ax ka sanuira ro xèkèsa 'inun 'è 'axúnti 'ikèn, 'imainun kamina mitsun ñu 'apákè akèñun uvas baka vino 'akè aribi 'è nanxunti 'ain. ¹⁹'Anan kamina achúshi chibu mitsun 'ucha kupín xarokè 'itánun 'inánti 'ain, 'imainun kamina rabé carnero achúshi baritiañu mitsun ñu 'atima 'akèkama mèníonani timéxun Diosan istisabi oi kuèenkin pikanti nanti 'ain. ²⁰Nania ka sacerdotenën ñuinakama nanxunkè a kèñunbi trigo aín bimi pán 'akè a 'imainun carnero rabé a 'è 'axunkin xaroti 'ikèn. Ax ka 'ènan upíira 'ianan sacerdote kamanaribi upí 'iti 'ikèn.

²¹A nètènbi kamina 'è rabinux timékanti 'ain, 'imainun kamina anun uisa ñu mëeti chabi 'atima 'ain. Ènè banax ka uínsaranbi ènkinma ax kikèsabiokin 'ati a 'ikèn, usa 'ikè ka aín papan tan 'ikè aín bakè bëchikè kamanaribi uinu kara tsotia anuxunbi ènè bana tanti 'ikèn.

²²Anun mitsun ñu 'apákè bikè nètè 'ikèbètan sènéonkin bixun kamina bikin ènkè a kamaira bari-tèkènbiankin bitima 'ain. Ax ka uni ñuñuma 'imainun bëtsi menu 'ikè uni mitsubè tsókè unikaman binun ènkè 'ikèn. 'Èx kana Dios 'aish mikaman Dios a 'ain.

Anun timéti pakon banoti nètè ñuikè bana

(Nm 29.1-6)

²³Usa 'ain ka amiribishi Nukèn 'Ibun Moisés kakèxa:

²⁴Èsokin kamina Israel unikama kati 'ain: Mapai achúshi 'imainun rabé 'uxè 'ikè anúan achúshi nètè 'irutabakè anun kamina mitsux achúshi nètè tantiti 'ain, 'imainun kamina a nètè upiti timéxun a sinánkin pakon banoti 'ain. ²⁵'Anan ka 'è nanxunkè ñu aribi anuxunbi 'ati 'akè anuxun xaroti 'ikèn, 'anan ka uisa ñu mëeti chabi 'atima 'ikèn.

A nètéan Diosan Israel unikaman 'ucha mënio ñuikè bana

(Nm 29.7-11)

²⁶Usa 'ain ka Nukèn Ibun amiribishi Moisés kakèxa: ²⁷Mapai achúshi 'imainun rabé 'uxè 'irutankèxa mapai rabé nètè 'irukè anun ka mitsun ñu 'atima 'akèkama tèrenti nètè 'iti 'ikèn. A nètè 'ikèbètan kamina aña ñubi piima upiti samáti timéxun 'è nanxunkè ñukama anuxunbi 'ati 'akè anuxun xaroti 'ain. ²⁸'Anan ka a nètèn uisa ñu mëetibi 'atima 'ikèn, ax ka

anun ñu 'atima 'akékama mëníoti nētē 'iti 'ikēn, a nētēn kana 'ēn mitsun 'uchakama tērēnti 'ain. ²⁹Uix kara a nētēn pikē mēēti samátisama tania akamina, uisa uni kara 'iti 'ikē abi mitsun ēmanua chikínti 'ain. ³⁰Imainun kana uin kara a nētēn ain ñu mēēti 'aia a uni, uisa uni kara 'iti 'ikē usa 'ikēbi, a ēmanua chikínti 'ain. ³¹Anun kamina uisa ñu mēētibi 'atima 'ain. A banax ka uínsaranbi ēnkinma ax kikēsabiokin 'ati 'ikēn, usa 'ikē ka ain papan tan 'ikē ain bakē bēchikē kamanribi uinu 'ikē menu kara tsotia anuxunbi tanti 'ikēn. ³²Ax ka achúshi nētē anun mitsux tantianan pima samáti nētē 'iti 'ikēn, usa 'ain ka mapai achúshi 'imainun rabé kēñun rabé nētē 'ikē a xupibukēbētan onxun a pékarakē a xupibutēkēnkēbētan anun sēnéonti 'ikēn.

Anun timéax 'utanu
'iti ñuikē bana
(Nm 29.12-40)

³³Amiribishi ka Nukēn 'Ibun Moisés katēkēankēxa:

³⁴Ēsokin kamina Israel unikama kati 'ain: Mapai achúshi 'imainun rabé 'uxē 'itankēxa anun mapai rabé 'imainun mapai achúshi nētē 'ikēbētan ka anun 'uta 'atankēxun anu timéxun mapai achúshi 'imainun rabé nētē 'imikin 'ē rabi-kanti 'ain, ³⁵a nētē 'irutabakē anun kamina upiti timékamē 'ēoti 'ain. A nētēn kamina uisa ñu mēētibi 'akantima 'ain. ³⁶A nētē kaman ka mapai achúshi 'imainun rabé

nētē timéxun 'ē nanxunkē ñukama xaroti 'ikēn, 'imainun ka a pékarakēbē upiti timēanan 'ē nanxunkē ñukama a xaroti 'ikēn. Ax ka achúshi nētē anun timēanan uisa ñu mēēti chabi atima nētē 'ikēn.

³⁷Ēnēx ka a nētēkama 'ikēbēmi anun 'ē rabi timékanti nētē 'ikēn, usa 'ikē kamina mitsun a nētēkama anun upiti timéti nētē kakin anēti 'ain, anun kamina 'ē nanxunkē ñukama xaroxuanan 'aímai kēñutia chimapushi 'itánun raíriribi xaronan, mitsun ñu 'apákē aín bimi upíbu bikē aribi xaroti 'ain, 'anan ka uvas baka vino, 'akē aribi anun 'ati nētē 'ikēbē 'ikēbētan 'ati 'ikēn, ³⁸'anan ka ñu mēētima nētē anun 'atankēxun bētsi nētēn 'ē 'inai-shiti nankē 'imainun 'ē nanxunti sinánxun nankē aribi uix kara kuēēnia an nanti 'ikēn. ³⁹Mapai achúshi 'imainun rabé 'uxē 'ikē anua mapai rabé 'imainun mapai achúshi nētē, anun mitsun ñu 'apákē bikin sēnéonkē 'ain kamina, achúshi fiesta 'akin 'ē rabi mapai achúshi 'imainun rabé nētē 'imi timékanti 'ain, a pékarakēbē ka anun tantiti nētēribi 'iti 'ikēn. ⁴⁰Nētē 'irutabakē anun kamina mitsun ñu 'apákē aín bimi upírabu tsasikin bianan, xēbin pēchi 'imainun i pēi 'aisamaira kēñun áloma kakē i, baka kuēbí kookē aín pēi akama bitankēxun mitsun 'uta anu mi 'iti 'ati 'ain, 'atankēx kamina anuax mapai achúshi 'imainun rabé nētē 'imi 'ē rabi kuēēnkanti 'ain. ⁴¹Kamabi baritia

anúan mapai achúshi 'imainun rabé 'uxë 'irukë, anun kamina mapai achúshi 'imainun rabé nëtë inúkin 'ë rabikin achúshi fiesta 'ai timékanti 'ain. Ax ka usaibi 'ikanti achúshi bana 'ikën, usa 'ikë ka aín papan tan 'ikë ain bëchikë kaman-ribi tanti 'ikën. ⁴²Anúan mapai achúshi 'imainun rabé nëtë 'ikë anun ka kamabi israel unikaman, bakë bëchikëkama anuabi bakéan

atux, 'uta 'atankëx anu 'iti 'ikën, ⁴³usai 'iá 'ikë ka kamabi mitsun rëbúnkikaman 'unánti 'ikën, Egipto menua 'ën chikínbëtsinkin békëx ka Israel unikamax 'uta 'atankëx anu 'iakëxa kixun. 'Ëx kana mitsun 'Ibu Dios 'ain.

⁴⁴Ësokin ka Moisésnën ënë bana-kama ñuikin Israel unikama a nëtë 'ikëbëtan Nukën 'Ibu rabiti nëtë ñuixunkin kakëxa.